



Sultan Kedah mahu graduan UUM jadi pemimpin kelas pertama

Oleh [Noorazura Abdul Rahman](#) - November 6, 2022 @ 3:49pm
bhnews@bh.com.my



Sultan Kedah, Sultan Sallehuddin ketika hadir pada Majlis Konvokesyen ke-34 Universiti Utara Malaysia (UUM) di sini, hari ini.- Foto NSTP/Noorazura Abdul Rahman

KUBANG PASU: Graduan Universiti Utara Malaysia (UUM) perlu menerapkan nilai ilmu, budi dan bakti yang baik sebagai pegangan dalam membentuk keperibadian mulia dalam menjadi pemimpin kelas pertama.

Sultan Kedah, Sultan Sallehuddin Badlishah, bertitah kejayaan graduan merangkul ijazah adalah permulaan kepada pelengkap pembangunan tamadun Malaysia yang maju.

"Jika anda memimpin sebuah rumah tangga, jadilah pemimpin rumah tangga berminda kelas pertama. Jika anda memimpin masyarakat, jadilah pemimpin masyarakat berminda kelas pertama.

"Jika anda memimpin organisasi, jadilah pemimpin organisasi berminda kelas pertama dengan menyemai falsafah ilmu, budi, bakti.

"Dalam masyarakat dahulu, konsep budi sangat popular dan diamalkan dalam kehidupan seharian. Orang yang berilmu jika tidak ada budi pekerti maka kebijaksanaannya akan hilang," titah baginda.

Baginda bertitah pada pada Majlis Konvokesyen UUM Ke-34 yang berlangsung di Dewan Mu'adzam Shah UUM Sintok di sini, hari ini.

Baginda yang juga Canselor UUM bertitah, individu berakhlak akan melahirkan keluarga dan komuniti yang mempunyai budi bahasa terbaik dan seterusnya membenihkan modal insan kelas pertama.

"Seperti mana Rasulullah SAW yang mempunyai perwatakan berkeperibadian tinggi, dilengkapi budi bahasa menjadi sunnah ikutan seluruh umat manusia.

"Sebagaimana sabda Baginda- 'Sebaik-baik manusia adalah yang paling bermanfaat bagi orang lain'; maka

bakti adalah satu perbuatan individu dalam menabur jasa kepada individu lain, masyarakat, bangsa dan negara.

"Setiap bakti yang ditaburkan akan memberi manfaat berpanjangan dan mampu mensejahterakan komuniti. Untuk berbakti, seseorang perlu mempunyai personaliti dalaman yang dibentuk oleh ilmu dan budi," titah baginda.

Terdahulu baginda berkenan mengisytiharkan sesi pertama Majlis Konvokesyen UUM dan menyampaikan ijazah kepada 275 graduan.

Seramai 6,611 graduan yang menamatkan pengajian pada 2021 menerima ijazah masing-masing pada majlis konvokesyen itu.